

Richard Tromp:

Trabounan ta andando pa completa tur detayenan paden y pafu di MFA Noord



ORANJESTAD – Su arkitektura moderno y e tamaño di e edificio riba su mes ta capta atencion di tur cu pasa cerca di cruzada principal na Noord.

Prome cu mita di aña, e edificio lo ta den operacion y brindando servicicionan di custumber di Oficina auxilia di gobierno, ademas di varios otro nobo na comunidad di Noord y bisindario.

E vision tras di e tipo di facilidadnan aki ta pa trece ciudadanonan di bario hopi mas cerca di otro y duna nan e facilidad pa varios actividadnan

necesario manera biblioteca, oficina di AZV, lokaalnan di computer, pa practica musica, baile y mucho mas. E ultimo detayenan di e facilidad di Noord ta trahando riba dje awor aki den preparacion pa cuminsa opera e facilidad. Director di MFA Noord, Sr. Richard Tromp, a comparti e avancen mas reciente.

Mientras cu construccion ta den su fasenan final, directiva ta sigui enfoca riba e servicicionan cu ta bay forma parti di su interior. Na esey ta añadi e entrenamiento di personal di Oficina auxilia di gobierno,



como tambe e area rond di e edificio, cu tambe mester sirbi como luga di encuentro pa habitantenan di e bario. Pronto ta bay anuncia 'Anochinan Informativo' pa asina actualisa e ciudadano riba desaroyo di e proyecto, con a incorpora e sugerencianan haci den sesionnan anterior y kico por haci ainda.

E envolvimento di e comunidad di Noord no ta caba ey, pasobra MFA tambe ta ehecutando un competencia memey di e scolnan basico den e distrito pa bin cu e miho number posibel pa e edificio. Studentenan di klas 5 y 6 di mayoria scol publico y priva, ta participante y na final, MFA hunto cu Instituto

di Cultura ta bay scoge esun cu miho ta refleha e identidad historico y cultural di e bario di Noord.

Tambe e organisacion y departamentonan di servicio publico, ta preparando nan mes pa drenta e edificio di MFA y cuminsa opera. Biblioteca Nacional y AZV ta algun di esunnan cu lo ta na disposicion y ta importante pa nan presencia y produccion ta cuadra cu e concepto moderno y practico di e luga.

Servicio di cinco strea pa cada persona ta e meta principal, y den e cuadro ey, ta busca pa tur empleado, incluyendo esunnan, di Oficina Auxilia di gobierno, traha di un manera

pro activo y profesional.

Na mesun momento cu MFA Noord ta yegando na fase final, construccion pa MFA Paradera a inicia y tambe ta spera cu ta keda cla pa e aña aki.

Hunto cu Santa Cruz, Savaneta y San Nicolas, e cinco facilidad multi funcional ta bay hisa e calidad di bida di e ciudadano rond di Aruba, ofreciendo e capacidad di por atende mas tanto asunto cerca di nan cas. Otro obhetivo importante ta cu cada edificio ta sirbi como punto di encuentro y trabou pa organisacion y gruponan di e bario, como tambe di interaccion social y manifestacion cultural y artistico pa su ciudadanonan. □